



Komunikadu Imprensa

17 Novembru 2017

Ezbosu Lei Protesaun ba Labarik

JSMP husu tenki iha konsultasaun signifkativa hodi hatan duni ba labarik sira-nia nesesidade espesiál iha Timor-Leste

JSMP konsidera labarik nia direitu tenki hetan konsiderasaun no tratamentu espesial husi estadu no garantidu iha lei atu kumpri obrigasaun Estadu Timor-Leste tuir lei internasionál no Konstituisaun Repúblika Timor-Leste. Tanba ne'e MSS nia Proposta Lei kona-ba Protesaun Labarik (Ezbosu Lei) anterior ne'e pozitivu tebes tanba propoin enkuadramentu legál kona-ba kuidadu no protesasaun ba labarik sira.

Iha tinan 2016, Konsellu Ministru VI Governu Konstituisional aprova Proposta Lei Protesaun Labarik no submete ba Komisaun A Parlamentu Nasionál iha mandatu Terseriu Lejislatura nia-rohan maibé Proposta ne'e lakonsege diskuti no aprova, nune'e proposta ne'e sai kaduka.

JSMP hanoin katak Proposta Lei ne'e importante tebes atu Ministériu Solidaridade Sosiál ka Komisaun A Parlamentu Nasionál bele reajenda no diskuti fali Proposta Lei ne'e hanesan prioridade lejislativu ida. Maibé, proposta lei anterior ne'e seidauk hetan konsultasaun ne'ebé nakloke ba públiku. Liu-liu la-iha konsultasaun adekuaudu ho instituisaun hirak ne'ebé servisu hodi tau matan ba direitu no protesasaun ba labarik. Tanba instituisaun hirak ne'e mak hatene no iha esperiensiá kleán liu kona-ba saida mak labarik sira presiza hodi enkuadra iha lei ne'e.

“JSMP apresia Ministériu Solidariedade Sosiál tanba dezenvolve ona ezbosu lei ida-ne'e, maibé preokupa katak konsultasaun ho organizasaun sosiédade sivil ne'ebé servisu iha area ne'ebé fó protesaun ba labarik, la envolve adekuada iha prosesu konsultasaun durante ne'e,” dehan Diretór Interino JSMP, Casimiro Dos Santos.

JSMP hanoin atu asegura envolvimentu entidade relevante sira iha area protesaun labarik, ezbosu (Proposta Lei) ne'e tenke tradús husi Lian-Portugés ba Lian-Tetun ka Lian-Inglés hodi fó biban ba ema hotu atu partisipa no kontribui hanoin no perspetiva oioin ba lei ne'e.

JSMP tenta ona halo elaborasaun no analiza ba Proposta Lei ne'e no konklui katak dispozisaun balun iha esbosu ne'e sei jerál liu no la klaru. Tanba ne'e, JSMP halo submisaun ida hodi husu konsiderasaun no atensaun ba Ministériu Solidariedade Sosiál hosi VII Konstitusionál no deputadu IV Lejislatura Parlamentu Nasionál antes aprova Proposta Lei ne'e.

Iha JSMP ninia submisaun ne'e, JSMP konsidera aplikasaun prátika ba dispozisaun balu no hamosu pergunta balu ba MSS no Parlamentu Nasionál relasiona ho asuntu sira hanesan prosesu konsultasaun ne'ebé minimú, entidade lokál sira ho responsabilidade ba kestaun sira ne'ebé relasiona ho labarik, rede sira kona-ba protesaun labarik, komunikasaun obrigatoria, autorizasaun hodi halo intervensaun, konsentimentu hosi inan-aman ba ezame médiku, medida protesaun – kuidadu institusionál, medida no prosesu protesaun – idade ba maioridade,– kestaun prosesuál, komisaun inter-ministeriál ba akompañamentu, baze-dadus iha nivél nasional, no servisu atendentu telefoniku.

Asuntu hirak ne'e importante tebes iha lei ida ne'e. Tanba ne'e, JSMP enkoraja atu fornese tradusaun ba Lian-Tetun no sei posivel iha Lian-Inglés atu disponivel kontribuisaun instituisaun internasionál iha aréa direitu no protesaun labarik. Aleinde ne'e tenki loke konsultasaun públiku hodi garante katak Proposta Lei ne'e kumpri loloos ho Konvensaun kona-ba Direitu Labarik no responde ba labarik sira-nia nesesidade iha Timor-Leste atu nune'e lei ne'e bele klaru, konsistente no realista, ho nune'e bele implementa ho efikas.

Antes ne'e, iha loron 18 fulan-Outobru 2016, Proposta Lei kona-ba Protesaun ba Labarik ne'e hetan ona konsiderasaun no aprovasaun husi Konsellu Ministrus, depoisde apresenta husi Ministériu Solidariedade Sosiál hosi VI Governu Konstitusionál.

Proposta Lei ne'e nia objetivu hodi promove labarik sira-nia direitu, prevene ameasa ba sira-nia bein-estar, no garante protesaun ba labarik sira ne'ebé iha risku no perigu, apoia sira-nia bein-estar no kompleta sira-nia dezvoltimentu.

Submisaun no Pareser JSMP kona-ba Proposta Lei Protesaun Labarik ba Parlamentu Nasionál disponível iha website JSMP: www.jsmp.tl iha parte/pajina submisaun nian.

Atu hetan tan informasaun, favoír ida kontaktu:

Casimiro dos Santos

Diretór Interino JSMP

Telefone:+670 3323883 | +670 77257466

Website: www.jsmp.tl